

“NE’E HA’U NIA ISIN. NE’E HA’U NIA RAN”
(cf. Mt 26,26-29; Mc 14,22-25; Lc 22,14-20; Jo 6,51-59; 1Cor 11,23-27)
(Reflexão kona ba Eucaristía)

Introdução

Amu Papa Francisco nia visita Apostólica mai ita rai doben Timor Lorosa’e durante loron tolu (9-11 de setembro de 2024) nu’udar biban kmanek nakonu ho graça ba ita Timoroan hotu, liu-liu ba ita sarani Católica sira. Nu’udar sarani, Kreda Católica iha Timor-Leste convida ita atu simu biban graça ne’e ho ksolok no fiar katak, Maromak hadomi nafatin povo doben Timor-Leste no la husik ita la’o mesak iha desafio oi-oin nebe ita hasoru daudaun iha era ukun-rasik-an nian.

Iha programa oi-oin visita Apostólica nian, Santa Eucaristia iha Tasi-Tolu mak momento culminante liu ba ita hotu, tanba Amu Papa Francisco rasik sei preside Missa hodi harohan no husu Maromak nia bênção no rahun diak mai rai no povo doben Timor-Leste. Tanba Eucaristia ne’e duni mak “hun no dudun” (*fons et culmen*) fiar sarani nian, nune’e, momento ida ne’e mak momento solene no sagrado liu durante visita Apostólica Amu Papa Francisco nian. Hanesan ita hatene ona, sarani barak sei hola parte activamente ho fiar no devoção nebe boot iha Santa Eucaristia hodi simu Hóstia Santa, katak Jesus Cristo nia futar Isin rasik, Ai-han moris rohan laek nian.

Relaciona ho âmbito sagrado nee, mak Ministro Extra-ordinário Sagrada Comunhão sira, simu mandato no missão husi Santa Igreja, katak husi Conferência Episcopal Timorese hodi tulun Ministro Ordinário sira (Bispos, Padres, diáconos) hodi fahe Jesus Cristo nia futar Isin ba maun alin sarani sira. Consciente katak, knaar eh ministério nee sagrado, mak Kreda hakarak tulun liu tan belun Ministro Extra-Ordinário da Sagrada Comunhão sira hodi bele prepara-an no haklean liu tan sira nia compreensão no devoção ba Sacramento Eucaristia liu husi recolecção espiritual ho nia temática: **“Ne’e Ha’u nia Isin. Ne’e Ha’u nia Ran”** (cf. Mt 26,26-29; Mc 14,22-25; Lc 22,14-20; Jo 6,51-59; 1Cor 11,23-27). Ida ne’e mak lia-fuan nebe sai husi Jesus Cristo nia futar ibun, iha hán-kalan ikus (Última Ceia) ho Nia escolante sira, nebe Kreda simu nudar kalan santo liu nebé Jesus Cristo harí eh institui Eucaristia. Lia-fuan ida ne’e duni mak Santa Igreja repete ho devoção no adoração boot wainhira celebra Santa Eucaristia.

Catecismo da Igreja Católica número 1323 afirama: *“Ita nia Salvador, iha hán-ikus nian, iha kalan Nia saran-An ba mate nian, Nia institui sacrificio eucarístico, katak Nia futar isin no rán, hodi perpetua nafatin husi tempo ba tempo, to’o Nia fila hikas mai, sacrificio cruz nian, nebe Nia confia ba Igreja, Ninia fén-kaben doben, memorial Ninia mate no moris-hi’as nian: sacramento piedade nian, sinal de unidade, caridade nebé kesi ita hamutuk, han-festa-hamutuk (banquete) festa páscoa nian nebe simu husi Cristo rasik, ita klamar nakonu ho graça, nune’e simu penhor glória moris rohan la’ek nian”*.

Dignidade Sacramental Eucaristia nian

Catecismo da Igreja Católica § 1210 – 1211 apresenta Sacramento hitu nuudar Lei foun nebé Jesus Cristo rasik mak harí eh institui. Sacramento hitu ne’e hola parte iha etapa no momento importante sira hotu moris sarani nian, hahú husi sarani ida nia moris, nia crescimento, tau matan ba sarani ida nia moris, nia missão no nia moris fiar nian iha dalan ba salvação rohan laek. Iha tradição teológica no

doutrina Católica nian, Sacramentos hitu, ida-idak, nudar sinais sensíveis (katak liu husi gestos exteriores no elementos tangíveis, ita ema bele kaer, sente no haré, por exemplo: wé, mina azeite, pão, tua, acompanhado ho formulação de palavras) no eficazes da graça, tanba Cristo rasik mak harí hodi bele hakbiit no hasantu fiar nain sira nebé la’o rai daudaun ba Reino Lalehan. Igreja considera sacramento sira eficaz, independentemente, ba dignidade husi ministros ordenado sira nebe celebra (“ex opere operato”), maibé nia efeito sira depende ba condição espiritual husi ema hirak nebe simu sacramento ne’e.

Nune’e, wainhira ita celebra Sacramento ida, ita ema criatura folin laek, tama iha esfera eh mundo Maromak nian, no Maromak ho nia graça hafoun fali ita nia dignidade nuudar “*a imagem e a semelhança de Deus* (cf. Gn. 1,27)”. Kona ba Sacramento da Eucaristia, CIC § 1211 afirma: “*a Eucaristia ocupa um lugar único, como «sacramento dos sacramentos»: «todos os outros sacramentos estão ordenados para este, como para o seu fim»*. Tanba iha Eucaristia mak, Uma Kreda celebra continuamente ho fiar mistério da redenção no salvação (terus, mate no moris hi’as) Jesus Cristo nian nebé acontece iha Páscoa Foun no rohan laek nian.

Mysterium fidei ida ne’e nia hún mak Jesus Cristo nia futar Lia fuan rasik nebe dehan: “*Tomai e comei todos: este é o meu corpo, oferecido em sacrifício por vós (...); Tomem e bebam, todos: este é o cálice do meu sangue, pela nova e eterna aliança, derramado por vós e por todos na remissão dos pecados. Faça isso em memória de mim*” (cf. 1 Cor 11,23-28; Mt 26,26-28; Mc 14,22-24; Lc 22,19-20).

Fiar no *memória eucarística*, nebe sai nuudar *fórmula da consagração eucarística* ne’e, Uma Kreda fielmente no vivamente transmite husi tempo ba tempo. Ita bele hanoin fali hahalok nebé Uma Kreda dahuluk nian halo, hanesan livro Actos dos Apóstolos 2,42-47 haktuir: “*Sira halo tuir nafatin Apóstolo sira nia hanorin no la’o hamutuk, silu pão no halo oração (...)* *ema hotu nebe fiar halibur hamutuk, no sira fahe buat hotu nebe sira iha ba malu. Sira fa’an sira nia riku soin no sasán, no fahe osan nee ba ema hotu, tuir ema ida-idak nia precisa. Loro-loron, sira halibur hamutuk iha templo no silu pão husi uma ba uma. Sira haan sira nia hahan ho haksolok no laran luak. Sira hahí Maromak, no simu tulun husi povo tomak. Loro-loron, Na’i hawa’in sira ho ema nebe hakarak simu salvação.*”

Husi reflexão no exposição iha leten, loos tebes duni, hodi celebra Eucaristia, liu-liu hodi simu lia bolu atu sai Ministro Extra-Ordinário da Sagrada Comunhão, ita hola fali consciência katak, Eucaristia mak centro husi ita sarani sira nia fiar tanba husi Eucaristia mak suli mai graça sira hotu Maromak nian ba ita ema liu husi Jesus Cristo nia futar Isin no Rán nu’udar aihan ba ita nia klamar hodi lori ita ba moris rohan-laek. Tuir Concílio Vaticano II afirma, Eucaristia mak “*fonte no ápice*” husi hahalok hotu moris cristã nian (LG 11; cf. CIC §1324) tanba nia fo kbiit ba sacramento sira seluk Kreda nian. Graça Maromak nian nee sai nudar wé-matan-inan ba ita nia **salvação no santificação**. Tanba Santíssima Eucaristia mak **Jesus Cristo rasik nebé fo Nia An tomak mai ita, Isin no Klamar no presente eh moris duni (realmente) iha ita leet.**

Atu haklean liu tan, wainhira ita lée karik Evangelho São João 13,1-30, nebe haktuir kona ba “*Última Ceia eh Han-kalan ikus Jesus ho Nia escolante sira*”, ita sei descobre katak, comandamento eh ukun fuan boot liu nebé Jesus insiste ba nia escolante sira nebé hán no hemu molok paixão, morte e ressurreição Jesus nian mak “*comandamento do amor e de servir*”. Jesus iha versículo 14 hateten: “Imi bolu Há’u Mestre no Na’i, no imi koalia lós tebes duni! Tanba Há’u Mestre no Na’i duni! Maske Na’i no Mestre Há’u fase ona imi ain, nune’e imi moos sei halo nune’e ba malu, hodi fase malu nia ain. Ida ne’e kona ba *Servir*. Tuir mai kona ba *Amar*, Jesus hatutan iha João 13,34-35: “Há’u fó ukun fuan foun ida ba

imi atui mi hadomi malu, hanesan Há'u hadomi imi. Nune'e ema hotu sei hatene katak imi mak Há'u nia escolante sira, wainhira imi hadomi malu! Domin nebe lolós tengki concretiza e realiza iha prática, mak servir.

La kleur tan, ita boot sira nebe simu ona mandato nudar Ministro Extra-Ordinário da Sagrada Comunhão sei kaer ho ita-boot sira nia liman rasik, *Santíssima Hóstia*, presença real Cristo nia futar Isin nian, hodi fahe ba maun-alin sira. Ita consciente katak ita ema la soi eh la digno ba knaar santo nee. Maske nunee, ita fiar metin mos katak, Jesus Cristo rasik nebe haraik-An tebes iha Hóstia Santa, hakarak usa ita nuudar ninia instrumento atu sai sasin no hatutan Ninia domin rohan-laek ba maun alin sira. Ita reza atu biban graça ida nee bele hasuli mos graça Sacramento Eucaristia nian mai ita ida-idak.